



CUMÜN DA SENT



# Il mas-chalch da Sent

Publicaziuns officialas. Cumpara seguond bsögn.  
2012-2014  
no. 14

7554 Sent, 24 schner 2013 / bmr

## I N V I D

**ad üna radunanza d'orientaziun in  
lündeschdi, als 11 favrer 2013 a las 20:15  
in chasa cumünala Misoch**

***Tractanda:***

1. Proget da sanaziun 2013/14  
da "l'Ospidal d'Engiadina Bassa – futur"

L'invid eseguischa seguond art. 22 da la constituziun cumünala.

La radunanza d'urna ha lö als 3 marz 2013. La missiva correspondententa vain protramissa a temp ütil.

### Cussagl cumünal

#### **Radunanza da vaschins**

Causa cha la radunanza da vaschins vaiva stuvü gnir suspaisa a chaschun da la radunanza cumünala dals 13 december 2012 ha il cussagl fixà uossa ün nouv termin. In seguit a la radunanza d'orientaziun dals **11 favrer 2013** ha lö la radunanza da vaschins.

**Tractandas:**

1. Salüd
2. Tscherna da dombravuschs
3. Conceder ün dret da fabrica davopro\*
4. Varia

### Cussagl da vaschins

#### **Sachs gelgs d'immundizchas**

In connex culs sachs gelgs, chi d'eiran concepits massa debels, vaiva quai dat reclomaziuns.

La PEB ha uossa reagi e postà da quels pro ün oter furnitur, il qual furnischa sachs chi'd existan d'ün material plü robust.

Prosmamaing pon quels sachs gnir retrats illa butia da plaz.

Il Cussagl deplorascha, chi ha dat disgusts ed as less per quai s-chüsar.

**Pel Cussagl cumünal  
Marianne Werro**

#### **Loipa Scuol-Martina**

La Banca Chantunala fa gronda reclama per la prevenziun finanziaria ill'età. Ün ulteriura prevenziun insistentia ais l'investiziun illa sandà. La part cha nus pudain influenzar es tanter oter quella cun movimaint e sport. Actualmaing vaina üna loipa da bellezza da Scuol fin Martina. Profitai --> quella ais averta d'ürant il di e la not ed i's po sgür quintar chella tegna amo fin in marz.

**Marianne Werro  
Departamaint da sandà**

# 1. Publicaziun

## Ordinaziuns da trafic, comunicaziun publica

1. La suprastanza cumünala da Sent ha l'intenziun dad introdüer sül territori cumünal las restricziuns da trafic seguaintas:

**limitaziun da larghezza maximala 2,3m (sig.2.18),**

sün la via champestra Spinatscha – Chanals, Sent

**müdada dal decret dal departamaint dals 11 avuost 1980, “pais maximal 9 t” (sig. 2.16)**

Il pais maximal sülla via champestra Spinatscha – Chanals, territori cumünal da Sent, vain dozà da 9 tonnas sün 18 tonnas

2. Cun quista masüra as vuol pussibilitar ün meglder access dals veiculs agriculs sün lur parcelas.
3. La restricziun da trafic planisada es gnüda approvada preliminariumaing als 7 november 2012 da la pulizia chantunala sün basa da l'art. 7 al. 1 e 2 EGzSVG\* ed art. 4 RVzEGzSVG\*
4. Objecziuns e posiziuns in connex cun l'ordinaziun da trafic planisada pon gnir inoltradas a la suprastanza cumünala da Sent e quai infra 30 dis a partir da la publicaziun. Davo l'examinaziun da las posiziuns inoltradas tira il cumün la decisiun e tilla publichescha i'l Fögl uffizial dal chantun Grischun cun indicaziun dals mezs legals a man dal tribunal administrativ.

### La suprastanza cumünala

\*Ledscha introductiva a la ledscha federala davart il trafic sün via

\* Ordinaziun a la ledscha introductiva da la ledscha federala davart il trafic sün via

## Cumün da Sent

### Comunicaziun decisiun d'approvaziun revisiun parziala da la planisaziun locala Panas-ch Sura

La Regenza dal Chantun Grischun ha approvà als 20 november 2012, cun decisiun nr. 1115 in applicaziun da l'art. 49 da la ledscha davart la planisaziun dal territori dal chantun Grischun (KRG) la revisiun parziala da la planisaziun locala, decisa da la radunanza cumünala dals 25 settember 2011, cun seguaintas cundiziuns, resalvas ed ordinaziuns.

- Plan da zonas e plan general da fuormaziun 1:2000/1:1000 Panas-ch Sura.
  - La procedura d'approvaziun pella zona da mansteranza incl. determinaziun dal god vain sistida pella dürada d'ün on.
  - Pella concepziun finala dal territori d'explotaziun e da sedimaint sun las cundiziuns formuladas i'l rapport da proget impegnativas.
  - Illa procedura per fabricats dadour la zona da fabrica (BAB) es da preschantar ün concept da recultivaziun detaglià ed id es d'ingaschar ad üna cumischiun davart l'ambiant accumpagnanta. Las surfatschas da biotop restauradas sun d'attribuir ad ün termin determinà ad üna zona per lös süts.

Ils mezs da planisaziun approvats ed il conclus cumplet da la Regenza sun depositats pro la chanzlia cumünala e da tals po gnir tut invista. Cunter las resalvas, pretaisas ed ordinaziuns cha quels cumpiglian po gnir tut recuors infra 30 dis, a partir da la data da publicaziun, sün basa da l'art. 102 alinea 1 KRG e seguond masüra da la ledscha chantunala davart la giurisdicaziun administrativa (VGR), pro'l tribunal administrativ dal Chantun Grischun, Obere Plessurstrasse 1, 7001 Cuaira.

### Cussagl cumünal

## **Vendita da la saira**

Fich stimats butiers ed iniziants da la “vendita da la saira”

Blers ons vaivat Vus invidà amiaivelmaing a Vossa clientella, sco segn d'ingrazchamaint pella fideltà, ad üna vendita da la saira i'l mais december. Quai d'eira alch uschè bel, pustüt ill'atmosfera d'inviern igluminada cun taimpra d'Advent. Eu chat quella sairada adüna sco üna gesta enorm generusa da Vus, üna fich bun'idea ed eu n'ha eir predschè ed admirà Vossa lavur e Vos ingaschamaint. Eu As vuless quattras ingrazchar fich per tout Vos ingaschamaint d'ürant ils ons scuors.

Displaschaivelmaing ais quist on in december croud'oura quel bellischem evenimaint. Sün dumanda vaivat Vus respus in möd different. I nu sta sgür na ne a mia persuna sco n'eir ad ingün oter da far pretaisas, pustüt per üna fatschenda chi d'eira voluntaria e dedichada sco regal. l'm stà però a cour da manzunar e da comunicar quai cha Vossa clientella in cumün eir disch:

“schi quai d'eira simplamaing **bel** e vaiva in nos chalender üna grond'importanza. L'idea ais fich buna, nus vain gugent quella sairada ed i nu bsögn' alch oter”.

Minchatant as bada pür cur ch'alch nun es plü quant cha quai manca.

**Marianne Werro**  
**Dep. cultura e bainesser social**

## **Fit da retard e fit da restituziun a partir dals 1. schner 2013**

Ils fits per quintes cumünals e dabuns vegnan fixats tenor pratica dal Chantun:

1. fits da retard 4 %
2. fits da restituziun 0.5 %

**Chascha cumünala**

## **Marcas da chans 2013**

A partir dals 1. schner 2013 nu daina plü oura la placa pel chan. D'ürant l'on vain tramiss il quint per l'imposta dal chan direct al possesur.

**L'administraziun cumünala**

## **Marchà da tschütschaiver**

Darcheu lessen manar tras ün marchà da tschütschaiver.

**Cura:** 13.02.2013 a partir da las 14.00 – 18.00 h

Chi chi vess plaschair da far ün stan da marchà (Marktstand), cun prodots indigens - societats o eir privats, bainvis sun eir expositurs d'utrò, fa il bain e s'annunzcha fin als 26.01.2013 pro Sent Turissem, Tel. 081 861 88 29. No ans allegrain sün üna gronda cumparsa.

**Sent Turissem**

## **Da dar a fit a Sent**

A partir dals 1. favrer ün' abitaziun da 2 ½ stanzas, lö quiet e sulagliv, cun piazza da parcar, pigna da laina (Schwedenofen), maschina da lavar e tumbler. Fit al mais fr. 950.-- exclusiv taxas fundamentalas. Interessent(a)s pon s'annunzchar pro Mario e Seraina Riatsch.

Telefon: 081 864 81 29 o mobile:079 413 05 66.

**Fam. Mario e Seraina Riatsch**

## **Giantar cumünaivel**

Als 14 favrer 2013 giaina a giantar sü Ftan i'l restorant Palafitta. No partin davent da la posta a las 11.10. Chi chi ha ½ taxa per plaschair dir. Annunzchas pro Erica Clalüna, tel. 081 864 07 59.

Sün ün bel inscunter salüda

**La corporaziun evangelica**

## **Infuormaziun per la populaziun Bogn Engiadina Scuol SA**

Per retrar entradas plü favuraivlas, esa davent dals 1. schner 2013, pro mincha cumprita a la chascha dal Bogn Engiadina, da muossar avant:

2. **carta d'indigens cotschna**, valabla
3. **conferma da la controlla d'abitants**, max. ün on veglia ed üna carta d'identità valida.

Infuormaziuns plü detagliadas davart las uras d'avertüra, nossas sportas, eui. chattais suot [www.engadinbadscuol.ch](http://www.engadinbadscuol.ch).

**Bogn Engiadina Scuol SA**